

Ministernan Eman, Sevinger y de Meza a cende luznan riba Village Plaza


Un stap mas leu den e realisacion di e Civic Spine pa San Nicolas

ORANJESTAD:(AAN) Dialuna atardi San Nicolas a conoce otro momento importante den su desaroyo danki na e bon trabou cu Gabinete Mike Eman ta haciendo pa e distrito aki. Minister President hunto cu Minister di Infraestructura Benny Sevinger y Minister di Finanzas Mike de Meza a firma acuerdo di ehecucion di e renobacion di Bernhardstraat. Di biaha su tras a realisa e cendemento di luz pa prome biaha riba Village Plaza,

den centro di ciudad. Presente tambe tabata Parlamentario di San Nicolas, Sra. Lorna Varlack. E plaza, segun ingeniero Arubano Raffy Kock, e Village Plaza ta forma parti di e plan pa duna San Nicolas un Civic Spine of Centro Civico. "Civic Spine ta un proyecto cu tin hopi tempo riba mesa despues cu a haci un estudio riba e miho manera pa restructura y revitaliza centro di San Nicolas." Ta asina cu e rotonde na entrada di San Ni-

colas y e caminda cu ta bay pa caya principal ta e prome fasenan di e proyecto aki. "Ora cu Gabinete Mike Eman a sinta na 2009, a revisa e plan aki y a actualisa pa sigui cu su ehecucion," e ingeniero a splica. A drecha e plaza pa hib'e for di un parkeerplaats, den un concepto nobo pa e bira un luga pa hende. Awo tin hopi mas luga pa sinta, core bicicleta y haci skateboarding. Instalacion di luz tabata esencial, manera Premier Eman a splica dialuna atardi. "Iluminacion ta un parti importante di e trabounan cu nos ta haciendo rond di Aruba pasobra e ta trece siguridad."

Mescos cu den Plaza Turismo y Linear Park, a introduci un sistema di luz hopi avanza di LED cu ta spaar energia. Riba e plaza cu ta cubri 533 meter cuadra a instala ocho mastlicht, den su mayoria cu dos luz cada un. Esaki ta esnan halto. Tambe tin 13 luz Bollard cu ta na altura di cintura, 8 uplights cu ta ilumina diferente di e palonan di mata y finalmente, tin 26 strips. Manera a menciona, tur e luznan ta LED. Mes importante cu anochi mester tin luz, a pensa cu den dia mester tin sombra. Pesey den combinacion cu St. Maartenstraat Gobierno a laga planta un 250 mata chikito y 100 palo di mata. E prome mandatario a elogia Minister Benny Sevinger di In-



fraestructura y henter su ekipo. Sevinger na su luga a indica cu "E desaroyo nobo aki ta danki na dos persona; e vision general di pais Aruba ta Mike Eman y e vision pa San Nicolas den man di Mike de Meza." Fuera di esey e ta gradici e trabou haci pa lunanan largo di ingenieronan Arubano, Infra Team, DOW, Minister Mike de Meza cu a sinti hunto cu e hendenan di San Nicolas pa mira kico nan kier y tin mester. "San Nicolas, bo por ta orguyoso di e dos Mike. Apenas nos a cuminsa, e miho ainda tin cu bin. Pabien y ban sigui traha," Minister Sevinger a bisa. Cu hopi satisfaccion Prome Minister a expresa dialuna atardi dilanti di un grupo grandi di habitantenan di e becindario,

cu "esaki ta basa riba e prioridad cu Gabinete Mike Eman a pone di traha infraestructura pa hende. Den e liña ey, San Nicolas ta entre e prome luganan cu nos a haya merece di atencion y pa inyecta fondonan den e mejoracion di su infraestructura." Den futuro, pa loke ta falta ainda pa construi di e Civic Spine patras di Hulpbestuurskantoor y Watertoren, "Village Plaza ta fungi como un punto di conexion entre e fasenan, of entre e proyecto di St. Maartenstraat cu e otro partinan," Ir. Kock a splica. Finalmente otro punto cu a tene cuenta cune ta pa ora Carnaval pasa, a modifica e hanchu di e caminda den Cooperstraat pa haci e trottoir mas hanchu. Asina e ta mas comodo y sigur.